



Број/Број: **03/1-50-1-7-44/09**  
Сарајево/Sarajevo, 26. 10. 2009.

## Z A P I S N I K

### **44. sjednice Zajedničke komisije za odbranu i sigurnost BiH Parlamentarne skupštine BiH, održane 26. 10. 2009., od 10 do 11,45 sati**

Sjednici su prisustvovali sljedeći članovi Zajedničke komisije: Branko Zrno, Šefik Džaferović, Slobodan Šaraba, Vinko Zorić, Mirko Okolić, Hazim Rančić i Adem Huskić.

Sjednici nisu prisustvovali: Ivo Miro Jović, Jozo Križanović, Drago Kalabić, Dušanka Majkić i Sulejman Tihić.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Marina Pendeš, zamjenica ministra odbrane BiH,
- Boško Šiljegović, parlamentarni vojni povjerenik BiH,
- Sead Avdić, Ministarstvo vanjskih poslova BiH,
- Dragiša Mekić, Velibor Lučić i Midhat Izetbegović, Ministarstvo vanjske trgovine i ekonomskih odnosa BiH,
- Ermin Pešto, Ministarstvo sigurnosti BiH,
- Zoran Jovanović, Kabinet predsjedavajućeg Vijeća ministara BiH,
- Žiko Krunić, Nezavisni odbor kao nezavisno tijelo policijske strukture u BiH,
- Jasmin Ramović, EUPM,
- Jasna Dragičević, Misija OSCE-a u BiH,
- Christian Haupt, USAID PSP u BiH,
- Amel Fako, Ambasada SAD-a u BiH,
- Catharina de Lange i Dijana Šatara, OHR,
- Alma Salkić- Mijić, Zakonodavno-pravni sektor PSBiH,

- Zoran Brkić, Sektor za odnose s javnošću PSBiH,
- Dragica Hinić, sekretar Zajedničke komisije za odbranu i sigurnost BiH, Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH. Članove Zajedničke komisije upoznao je s dnevnim redom i napomenuo da je članovima pred sjednicu Komisije dostavljen Izvještaj o radu SIPA-e za prvih devet mjeseci 2009. godine. Ovaj izvještaj Pisarnica PSBiH zaprimila je pola sata prije početka sjednice, a njegovo razmatranje predviđeno je u okviru 4. tačke dnevnog reda. Također, u međuvremenu je dostavljen i poziv Centra za sigurnosne studije za prisustvo Regionalnom seminaru o temi: „Uloga nevladinih organizacija u procesu integracija u NATO“, koji bi trebalo da bude razmatran u okviru tekućih pitanja. Potom je otvorio raspravu o predloženom dnevnom redu. **Slobodan Šaraba** je, s obzirom na navedene okolnosti u vezi sa Izvještajem SIPA-e, predložio da se ovaj izvještaj skine s dnevnog reda ove sjednice i razmatra na narednoj, uz objašnjenje da članovi Komisije nisu imali dovoljno vremena za kvalitetnu pripremu i raspravu.

**Mirko Okolić** podržao je prijedlog Slobodana Šarabe, smatrajući da bi bilo neozbiljno raspravljati i donositi bilo kakve zaključke o materijalu koji članovi Komisije nisu uopće uspjeli pročitati do početka sjednice.

**Branko Zrno** potom je zaključio raspravu i predložio Komisiji da usvoji dnevni red s prijedlozima i izmjenama koje su predložili Slobodan Šaraba i on.

Članovi Zajedničke komisije prihvatili su navedene prijedloge, te je konstatirano da 44. sjednica Zajedničke komisije za odbranu i sigurnost BiH ima sljedeći

### **DNEVNI RED**

1. Usvajanje Zapisnika 43. sjednice Zajedničke komisije;
2. Razmatranje Prijedloga zakona o kontroli vanjskotrgovinskog prometa robe i usluga od strateške važnosti za sigurnost BiH - druga komisijska faza (predlagač: Vijeće ministara BiH);
3. Davanje mišljenja o tekstu Poslovnika o radu Nezavisnog odbora;

4. Razmatranje Informacije o mogućnosti angažiranja jedinica OSBiH u misijama Snage međunarodne sigurnosne pomoći „ISAF“ u Afganistanu (sačinilac: Ministarstvo odbrane BiH);
5. Informacija o sastanku ministara odbrane EU, Geteborg, 29. 9. 2009. (sačinilac: Ministarstvo vanjskih poslova BiH);
6. Razmatranje Izvještaja sa sastanka zemalja Jadranske povelje, održanog 29. 9. 2009. (sačinilac: Ministarstvo vanjskih poslova BiH);
7. Obavještenje Vijeća ministara BiH u vezi s problematikom upravljanja i održavanja graničnih prijelaza (sačinilac: Vijeće ministara BiH);
8. Tekuća pitanja:
  - a) Razmatranje Informacije o radnoj posjeti institucijama SAD-a, od 3. do 10. 10. 2009.
  - b) Poziv Misije OSCE-a u BiH na Regionalni seminar o temi: „Primjena OSCE-ovog kodeksa ponašanja u političko-vojn timer aspektima sigurnosti, Ilidža, od 3. do 5. 11. 2009.
  - c) Poziv na radionicu o temi: „Zaštita tajnih podataka“, Kupres, 9. i 10. 11. 2009.
  - d) Poziv na obuku iz oblasti sigurnosne politike BiH, Ilidža, od 10. do 19. 11. 2009.
  - e) Poziv CSS-a na Regionalni seminar o temi: „Uloga nevladinih organizacija u procesu integracije u NATO“, Sarajevo, 27. 10. 2009.;
  - f) Poziv Misije OSCE-a u BiH za radnu posjetu Parlamentu, radnim tijelima i instituciji civilne zaštite Republike Italije, od 3. do 6. 11. 2009.

#### **Ad. 1. Usvajanje Zapisnika 43. sjednice Zajedničke komisije**

**Hazim Rančić** predložio je da se izvrši korekcija Zapisnika na strani 6., u okviru 3. tačke dnevnog reda, koja se odnosi na razmatranje Poslovnika o radu Nezavisnog odbora, i to u dijelu njegove diskusije koja se odnosi na član 11. stav 1. Korekciju treba izvršiti u smislu da se navede da se kriteriji utvrđuju propisima koji se odnose na agencije iz kojih šefovi dolaze.

Zajednička komisija potom je jednoglasno, sa sedam glasova „za“, usvojila Zapisnik 42. sjednice Zajedničke komisije s korekcijom koju je predložio Hazim Rančić.

**Ad. 2. Razmatranje Prijedloga zakona o kontroli vanjskotrgovinskog prometa robe i usluga od strateške važnosti za sigurnost BiH - druga komisajska faza (predlagač: Vijeće ministara BiH)**

**Branko Zrno** podsjetio je da je Vijeće ministara BiH dostavilo mišljenje o amandmanima Dušanke Majkić i Šefika Džaferovića, koje je tražila Zajednička komisija, te napomenuo da su članovi Komisije s materijalima za sjednicu dobili u pisanoj formi i saglasnost Dušanke Majkić za izmjene amandmana koje je uradilo Vijeće ministara BiH.

Kako nije vođena daljnja rasprava o ovoj tački, članovi Komisije izjasnili su se o amandmanima Dušanke Majkić koje je korigiralo Vijeće ministara BiH, kao i o amandmanu Šefika Džaferovića.

Komisija je jednoglasno, sa sedam glasova „za“, usvojila Amandman 1. Šefika Džaferovića i korigirane amandmane 1., 2. i 4. Dušanke Majkić, te prosljedila Izvještaj o ovom zakonu u daljnju zakonodavnu proceduru.

**Ad. 3. Davanje mišljenja o tekstu Poslovnika o radu Nezavisnog odbora**

**Branko Zrno** podsjetio je prisutne da je rasprava o Poslovniku o radu Nezavisnog odbora vođena na prethodnoj sjednici Komisije. Informirao je i o činjenici da je tumačenje službe Predstavničkog doma takvo da je zadatak Komisije u ovom slučaju da da pozitivno ili negativno mišljenje o ovom poslovniku, bez daljeg ulaska u njegov sadržaj. S obzirom da je Zajednička komisija za odbranu i sigurnost BiH radno tijelo oba doma PSBiH, takvo tumačenje smatra uskraćivanjem poslovnčkih i prava koja Komisiji pripadaju, iako je time Komisiji umnogome olakšan rad. Još je podsjetio članove Komisije da je Nezavisni odbor održavanja posljednje sjednice Komisiji dostavio novi integralni tekst Poslovnika u kojem su dijelom ugrađene primjedbe usvojene nakon prethodne rasprave o ovom pitanju. Zatim je otvorio raspravu.

**Šefik Džaferović** predložio je da Komisija uradi ono što i jeste njen posao prema poslovnicima oba doma PSBiH, te zaključio da rasprava vođena na prošloj sjednici o ovom poslovniku nije bila bezrazložna. Zaključio je da predloženi amandmani treba da budu sastavni dio ovog poslovnika, a u tome je Komisija na svojoj prošloj sjednici pomogla Nezavisnom odboru, te je u tom smislu predložio da Komisija podrži novi integralni tekst.

**Mirko Okolić** konstatirao je da su prihvaćene skoro sve njegove primjedbe koje je na prošloj sjednici dao, izuzev one koja se odnosi na član 16. stav 3., a kod kojeg treba samo izvršiti

tehničke popravke i izmijeniti postojeći redoslijed riječi u rečenici. Stoga je još jednom sugerirao da se izvrše ove tehničke korekcije, čime bi se ovaj stav učinio razumljivijim.

**Adema Huskića** je, u vezi s članom 16. stav 1., zanimalo kako će se Nezavisni odbor postaviti ako Vijeće ministara BiH smijeni nekog od direktora sigurnosnih agencija, uz obrazlaženje da Poslovnik Nezavisnog odbora nije obavezujući za Vijeće ministara BiH.

**Žiko Krunić**, predsjedavajući Nezavisnog odbora, istakao je da je Nezavisni odbor postupio onako kako je to Zajednička komisija sugerirala na posljednjoj sjednici, pri čemu je učinjen maksimalan napor kako bi se prilikom definiranja ovog dokumenta prihvatila volja zakonodavca. Elaborirajući sve primjedbe članova Komisije, posebno se osvrnuo na član 16., navodeći da je volja zakonodavca, prilikom uspostavljanja Nezavisnog odbora, bila da ima jedno politički neutralno tijelo, te zaključio da nije istina da takvo tijelo ne bi prihvatilo bilo kakvu inicijativu koja bi došla od PSBiH ili Zajedničke komisije, kao njenog radnog tijela. Kada je, pak, u pitanju smjena direktora, naveo je da su u Poslovnik ugrađene odredbe Zakona o nezavisnim tijelima policijske strukture u BiH, a koji definira ovakve situacije.

**Hazim Rančić** zahvalio se Nezavisnom odboru na trudu koji je učinio kako bi primjedbe iznesene na prošloj sjednici Zajedničke komisije bile ugrađene u tekst Poslovnika, te konstatirao da i pored toga ipak nisu sve sugestije i prijedlozi postale njegov sastavni dio. To se naročito odnosi na one amandmane koji su bili predloženi, a Nezavisni odbor se iz nekih razloga s njima nije saglasio. Citirajući član 2., stav 2. Zakona o nezavisnim i nadzornim tijelima policijske strukture BiH, te poslovničke odredbe domova PSBiH, zaključio je kako Predstavnički dom PSBiH nema pravo ograničavati rad Zajedničke komisije na navedeni način, jer je Komisija nadležna za raspravu o pitanjima vezanim za Nezavisni odbor i kompletnu policijsku strukturu. Stoga je zaključio da Zajednička komisija svojim radom ne pravi nikakvu opstrukciju u ovom procesu i u vezi s tim naveo da Komisija treba imati pravo na amandmansko djelovanje na tekst ovog poslovnika. Dajući ponovo primjedbe na pojedine odredbe Poslovnika, zaključio je da odgovornost za neusvajanje ovog poslovnika ne leži na Zajedničkoj komisiji, već na Nezavisnom odboru, koji je sačinio prijedlog novog teksta Poslovnika nakon primjedbi datih od članova Komisije, te podsjetio da je Poslovnik Odbora za žalbe građana podržala i Komisija i na domovi PSBiH bez mnogo rasprave. Stoga je zamolio da Komisija po okončanju ove tačke usvoji zaključak u kojem će od Kolegija Predstavničkog doma zatražiti otvaranje amandmanske faze u procesu usvajanja ovog poslovnika.

**Slobodan Šaraba** ocijenio je da rasprava o ovom pitanju u pojedinim dijelovima nije išla u pravom smjeru, te zaključio da Komisija treba usvojiti ovakav poslovnik, pošto je

predsjedavajući Nezavisnog odbora naveo da amandmani predstavljaju određeno poboljšanje postojećeg teksta, te tražiti otvaranje amandmanske faze, koja bi omogućila svim poslanicima i delegatima da dodatnim amandmanima poprave predloženi tekst Poslovnika.

**Branko Zrno** potom je zaključio da je iz rasprave vidljivo da ponovo ima puno primjedbi i na novi integralni tekst Poslovnika, te predložio da Zajednička komisija prihvati taj tekst Poslovnika s ugrađenim primjedbama i prijedlozima, te usvoji zaključak kojim će predložiti domovima PSBiH da odluče o mogućnosti otvaranja amandmanske faze u ovom slučaju, s obzirom na postojanje velikog broja suštinskih primjedbi na tekst. Ovim bi i Komisija, kao nadležno radno tijelo, mogla amandmanski djelovati na predloženi tekst Poslovnika.

Zajednička komisija zatim je jednoglasno, sa sedam glasova „za“, usvojila navedeni prijedlog Branka Zrne.

#### **Ad. 4. Razmatranje Informacije o mogućnosti angažiranja jedinica OSBiH u misijama Snage međunarodne sigurnosne pomoći „ISAF“ u Afganistanu (sačinilac: Ministarstvo odbrane BiH)**

**Branko Zrno** je u uvodnim napomenama istakao da se radi o Informaciji koju Komisija, u skladu s poslovničkim odredbama, prima k znanju, te podsjetio da sjednici prisustvuje i zamjenica ministra odbrane Marina Pendeš, koja bi mogla dati odgovore na eventualna pitanja u vezi s Informacijom.

**Slobodan Šaraba** podsjetio je da, prema odredbama Zakona o o učešću pripadnika OSBiH, policijskih i drugih službenika u operacijama podrške miru, Zajednička komisija potvrđuje svaku pojedinačnu odluku koju o ovim misijama donosi Predsjedništvo BiH, a nakon toga treba biti potvrđena i u domovima PSBiH. Konstatirao je da Predsjedništvo BiH još nije donijelo tu odluku o upućivanju novog kontingenta vojnika OSBiH u misiju ISAF, a da su aktivnosti koje se provode na tom planu već u punom jeku. Kao primjer naveo je upućivanje predstavnika Ministarstva odbrane BiH u Afganistan i slično. Mišljenja je da se ovdje čine pogrešni koraci, jer će se napraviti mnogo aktivnosti na tom polju bez valjane odluke Predsjedništva BiH i zvaničnog stava PSBiH. Sve učinjeno do sada predstavlja neki vid pripreme šire javnosti u BiH u vezi s ovom misijom, a da još nisu ispunjeni svi aspekti sigurnosti navedeni članom 4. Zakona, te to predstavlja osnovni razlog zašto on ima negativan stav o ovom pitanju. Zaključio je da treba obrnuti red rješavanja stvari i ispoštovati zakonsku proceduru kada je učešće OSBiH u misiji ISAF u pitanju.

**Mirko Okolić** ocijenio je da je dobro što je ova informacija dostavljena Zajedničkoj komisiji, kako bi se njeni članovi iz sadržaja upoznali šta je Ministarstvo odbrane BiH uradilo do sada u vezi s misijom u Afganistanu. Posebno se osvrnuo na dio Informacije, na njenoj 2. strani, u kojem se govori o razmatranju tri moguće opcije učešća jedinica OSBiH u misiji, navodeći pri tome da nakon posljednjeg istupa ministra odbrane Republike Turske ne bi bilo dobro uputiti pripadnike OSBiH u sastav kontingenta OS Republike Turske. S tim u vezi komentirao je i prijedlog zaključka broj 2., navedenog na strani 4., u kojem se zadužuje Ministarstvo odbrane BiH da ostvari koordinaciju s Ministarstvom odbrane i Oružanim snagama Republike Turske radi provođenja priprema za upućivanje pripadnika OSBiH u misiju ISAF. Predložio je da se o ovim pitanjima obave razgovori i dobro vodi računa prilikom donošenja odluke o učešću pripadnika OSBiH, kako bi kao rezultat imali usvajanje ove odluke u Parlamentarnoj skupštini BiH.

**Šefik Džaferović** kratko je replicirao Mirku Okoliću i naveo da ova informacija prezentira traganje za najsigurnijim aspektom i najsigurnijim mjestom u Afganistanu, imajući u vidu kompletnu misiju ISAF i OSBiH u okviru nje.

**Marina Pendeš** navela je da su sve aktivnosti na ovom planu do sada rađene u skladu sa Zakonom o odbrani BiH, Zakonom o službi u OSBiH, te Zakonom o učešću pripadnika OSBiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu. Navela je da ovo ne predstavlja prvu aktivnost Ministarstva odbrane BiH kada je u pitanju ispitivanje moguće lokacije na koju bi se mogli uputiti pripadnici OSBiH, te istakla da je Ministarstvo odbrane ovaj zadatak dobilo od Predsjedništva BiH, kako bi se izvršilo izviđanje u Afganistanu i stvorila slika o terenu. Tako je delegacija ovog ministarstva, s ministrom odbrane i još nekoliko generala OSBiH, nedavno boravila u Afganistanu, a nakon toga Predsjedništvu BiH uputila procjenu sa aspekta kapaciteta i sa sigurnosnog aspekta. Predsjedništvo BiH nije prihvatilo u potpunosti prijedlog ove procjene Ministarstva odbrane BiH, već je sugeriralo da se o ovom pitanju nastave razgovori s pojedinim koalicijskim partnerima u misiji ISAF. I prilikom donošenja ove Odluke o učešću pripadnika OSBiH u misiji ISAF, koordinacijsko tijelo sastavljeno od predstavnika pet resornih ministarstava dat će svoje mišljenje o opravdanosti učešća ove misije s finansijskog i svakog drugog aspekta. Odgovarajući na diskusiju Mirka Okolića, navela je da je Ministarstvo odbrane BiH ovu informaciju uputilo Predsjedništvu BiH, koje ju primilo k znanju i donijelo zaključke po njoj, o čijem sadržaju je upoznala članove Komisije. Još je navela da je Ministarstvo odbrane BiH ovu informaciju uputilo Zajedničkoj komisiji na

znanje, te istakla da će konačna odluka o učešću pripadnika OSBiH u misiji ISAF u parlamentarnu proceduru biti upućena naknadno i u skladu s važećim zakonskim propisima.

**Branko Zrno**, zaključujući raspravu o ovoj tački, još jednom je naglasio da se radi samo o informativnom razmatranju angažiranja pripadnika OSBiH u misiji ISAF, te naveo da će se šira rasprava o ovom pitanju voditi kada Zajednička komisija bude razmatrala prijedlog odluke. S tim u vezi predložio je da Komisija ovu informaciju primi k znanju.

Zajednička komisija primila je k znanju Informaciju o mogućnosti angažiranja jedinica OSBiH u misijama Snage međunarodne sigurnosne pomoći „ISAF“ u Afganistanu.

#### **Ad. 5. Informacija o sastanku ministara odbrane EU, Geteborg, 29. 9. 2009.**

**(sačinilac: Ministarstvo vanjskih poslova BiH)**

Kako o ovoj tački dnevnog reda nije vođena posebna rasprava, Zajednička komisija primila je k znanju Informaciju o sastanku ministara odbrane EU, održanog u Geteborgu, 29. 9. 2009., a koju je sačinilo Ministarstvo vanjskih poslova BiH.

#### **Ad. 6. Razmatranje Izvještaja sa sastanka zemalja Jadranske povelje, održanog 29. 9. 2009. (sačinilac: Ministarstvo vanjskih poslova BiH)**

**Branko Zrno** je u uvodnim napomenama naveo da se radi o Izvještaju koji je upućen Parlamentarnoj skupštini BiH, te da se Zajednička komisija, u dijelu u kojem je nadležna, o njemu treba očitovati i dati svoje mišljenje, koje će eventualno proslijediti i domovima PSBiH. Potom je predložio zaključak kojim Zajednička komisija predlaže domovima PSBiH otvaranje rasprave o Izvještaju i u okviru njihove nadležnosti zauzimanje stava u vezi s dijelom prijedloga zaključaka na 3. stranici, s posebnim osvrtom na prijedlog zaključaka br. 4. i 5., koje bi trebalo korigirati u skladu s predočenim stavom predstavnika Republike Hrvatske.

Zajednička komisija je, nakon rasprave, jednoglasno, sa sedam glasova „za“, usvojila prijedlog zaključka Branka Zrne.



**Ad. 7. Obavještenje Vijeća ministara BiH u vezi s problematikom upravljanja i održavanja graničnih prijelaza (sačinilac: Vijeće ministara BiH)**

**Branko Zrno** istakao je da u konkretnom slučaju Vijeće ministara BiH samo informira Komisiju šta je uradilo do sada, te prema tome predložio da Komisija ovo obavještenje primi k znanju.

Zajednička komisija potom je primila k znanju Obavještenje Vijeća ministara BiH u vezi s problematikom upravljanja i održavanja graničnih prijelaza.

**Ad. 8. Tekuća pitanja:**

**a) Razmatranje Informacije o radnoj posjeti institucijama SAD-a, od 3. do 10. 10. 2009.**

**Branko Zrno** posebno je potencirao zaključak broj 3. predložen u Informaciji o radnoj posjeti SAD-u, koji predstavlja rezultat dosadašnjeg rada Zajedničke komisije, a kojim predstavnici SAD-a traže neposredan kontakt s predstavnicima Ministarstva odbrane BiH i OSBiH u vezi s pružanjem pomoći na uništavanju viška naoružanja i municije. Informirao je članove Komisije da SAD raspolažu potrebnim finansijskim sredstvima i s tim u vezi predložio zaključak da Zajednička komisija dostavi ovu informaciju Ministarstvu odbrane BiH i Predsjedništvu BiH, kako bi ove institucije o ovom pitanju mogle preduzeti tražene korake i dati povratno obavještenje Komisiji u što kraćem roku. Također je predložio da se o prosljeđivanju ove informacije navedenim institucijama obavijesti i Ambasada SAD-a u BiH. Članovi Zajedničke komisije jednoglasno su, sa sedam glasova „za“, prihvatili prijedloge zaključaka Branka Zrne, te u potpunosti primili k znanju Informaciju o radnoj posjeti institucijama SAD-a.

**b) Poziv Misije OSCE-a u BiH na Regionalni seminar o temi: „Primjena OSCE-ovog kodeksa ponašanja u političko-vojnim aspektima sigurnosti, Ilidža, od 3. do 5. 11. 2009.**

Zajednička komisija odlučila je da na ovom seminaru učestvuje Branko Zrno.

- c) Poziv na radionicu o temi: „Zaštita tajnih podataka“, Kupres, 9. i 10. 11. 2009.**

Komisija je odlučila da na ovoj radionici učestvuju Branko Zrno i Adem Huskić.

- d) Poziv na Obuku iz oblasti sigurnosne politike BiH, Ilidža, od 10. do 19. 11. 2009.**

Zajednička komisija odlučila je da će naknadno odlučiti koji će njen član prisustvovati obuci iz oblasti sigurnosne politike.

- e) Poziv CSS-a na Regionalni seminar o temi: „Uloga nevladinih organizacija u procesu integracije u NATO“, Sarajevo, 27. 10. 2009.**

Komisija je odlučila da na ovom seminaru učestvuju Adem Huskić i Željko Grubešić.

- f) Poziv Misije OSCE-a u BiH za radnu posjetu Parlamentu, radnim tijelima i instituciji civilne zaštite Republike Italije, od 3. do 6.11.2009.**

Mirka Okolića zanimalo je zašto Kolegij Predstavničkog doma nije odobrio odlazak šest predstavnika Zajedničke komisije u radnu posjetu institucijama Republike Italije, iako Misija OSCE-a u BiH snosi troškove. Istakao je također da Zajednička komisija ima 12 članova te da nije korektno da njenu delegaciju predstavlja manje od šest članova.

Branko Zrno informirao je prisutne da je Kolegij Predstavničkog doma donio takvu odluku iako je navedeno da Misija OSCE-a u BiH snosi troškove za ovu posjetu, te da je informiran da je još jedan od razloga za takvu odluku i taj što je sjednica tog doma odgođena i zakazana za 4.11.2009.

Nakon rasprave, odlučeno je da tri člana koji će ići u ovu radnu posjetu budu: Slobodan Šaraba, Hazim Rančić i Vinko Zorić, a da sekretar Komisije odmah po završetku ove sjednice obavli razgovor s Belkićem i Lozančićem, informira ih o svim činjenicama u vezi s ovim putovanjem, kako bi, eventualno, promijenili svoju odluku i omogućili učešće šest članova Zajedničke komisije u ovoj posjeti.

ZAPISNIK SAČINILA

PREDSJEDAVAJUĆI KOMISIJE

**Dragica Hinić**

**Branko Zrno**

